

आकाशवाणी रायपुर (छत्तीसगढ़)
प्रादेशिक समाचार बुलेटिन
(छत्तीसगढ़ी)

18.10 रविवार

दिनांक 16.02.2025

प्रमुख समाचार —

1—छत्तीसगढ़ म पंचायत चुनई बर तीन चरण म होही मतदान— पहलइया चरण म काली 17 फरवरी के डारे जाही वोट ।

2—प्रदेस म आने—आने दुर्घटना म तीन लोगन के मउत होंगे — कतकोन लोगन होइन घायल ।

अउ

3— छत्तीसगढ़ के नांव एक ठन अउ उपलब्धि — भिलाई के श्रीमंत झा ह नॉर्वे म पैरा—आर्म रेसलिंग कप म जितिस रजत पदक ।

.....

त्रिस्तरीय—पंचायत चुनाव

_____ छत्तीसगढ़ म पंचायत चुनई बर 17, 20 अउ 23 फरवरी के दिन तीन चरण म वोट डारे जाही । पहलइया चरण बर काली 17 फरवरी के राज्य के तिरपन विकासखंड म बिहनिया सात बजे ले मंझनिया तीन बजे तक वोट डारे जाही । सिरिफ बस्तर संभाग बर बिहनिया छै बजके 45 मिनट ले मंझनिया दू बजे तक वोट डारे के बेरा तय करे गेहे । राज्य निर्वाचन आयोग ह बने ढंग ले मतदान कराय बर सबो तियारी ल कर डारे हे । ओति, आज मतदान समान बांटके दल मन ल खाना करे गीस । उहें, मतदान केंद्र म सुरक्षा के चाक—चौबंद बेवस्था करे गेहे । बतादन कि पंचायत चुनई म बैलेट पेपर ले मतदान करे जाही । पहलइया चरण म 57 लाख 99

हजार छै सौ साठ लोगन अपन मताधिकार के परयोग कर सकहीं। एमा 28 लाख 70 हजार आठ सौ उनसठ पुरुष अउ 29 लाख 28 हजार सात सौ इन्कावन माईलोगन अउ तृतीय लिंग के 50 मतदाता सामिल हैं।

दूसरइया चरण बर 20 फरवरी के प्रदेस के 43 विकासखंड अउ तीसरइया चरण म 23 फरवरी के 50 विकासखंड म वोट डारे जाही। पंचायत चुनई के तहत पहलइया चरण के मतदान होय के बाद उहीच दिन मतगणना घलो होही।

त्रिस्तरीय पंचायत चुनई के तहत जिला पंचायत सदस्य के 433, जनपद सदस्य के दू हजार नौ सौ तिहत्तर, सरपंच के ग्यारा हजार छै सौ बहत्तर अउ वार्ड पंच के एक लाख साठ हजार एक सौ अस्सी पद बर वोट डारे जाही। बतादन कि पंचायत चुनई बर इकतीस हजार इकतालीस मतदान केंद्र बनाय गेहे। जेमा सात हजार एक सौ अट्ठाईस संवेदनसील अउ दू हजार एक सौ इकसठ अति-संवेदनसील मतदान केंद्र हैं।

नगरीय निकाय चुनाव—वोट फीसदी

प्रदेस म होय नगरीय निकाय चुनई म भारतीय जनता पार्टी ल महापौर अउ अध्यक्ष पद बर करीबन 56 फीसदी वोट मिले हैं। उहें, कांग्रेस ल 31 फीसदी ले जादा वोट मिल पाइस। ऐति, भाजपा के पार्षद प्रत्यासी मन ल करीबन 47 फीसदी अउ कांग्रेस पार्षद प्रत्यासी मन ल करीबन 33 फीसदी वोट मिले हे।

बतादन कि छत्तीसगढ़ म ए दरी अध्यक्ष अउ महापौर के चुनई प्रत्यक्ष प्रणाली ले कराय गीस। प्रदेस के जउन दस नगर निगम म चुनई होय हे, उंहा महापौर पद बर भाजपा प्रत्यासी मन के जीत होइस। उहें, प्रदेस के 49 नगर पालिका म ले 35 अउ एक सौ चौदह नगर पंचायत म ले इकयासी म घलो भाजपा उम्मीदवार मन जीतिन।

निलंबन

चुनई कारज म लापरवाही के सेति कोरिया जिला के सोनहत तहसील के दू इन करमचारी मन उपर कारवाही करे गीस। बतादन कि प्रणव भट्टाचार्य अउ रामसेवक धुर्वे ल निलंबित कर दे गेहे।

उहे, बलौदाबाजार म घलो चुनई कारज म लापरवाहिच के सेति दू सौ छिहत्तर शिक्षक अउ करमचारी मन ल नोटिस जारी करे गेहे। ए सबो करमचारी मन मतदान दल के प्रसिक्षण के बेरा सूचना देय बिगर गैर—हाजिर रिहीन, ते पाय के कलेक्टर दीपक सोनी ह नोटिस भेजके चौबीस घंटा के भीतर जवाब मांगे हे।

दुर्घटना

कोरबा जिला के डोडकाखार गांव के तिर टरक के चपेट म आय ले फटफटी सवार दू लोगन के मउत होगिस। मिले जानकारी ले टरक ह डेम ले राखड़ जोर के उरगा डहार जावत रिहीस, इही बेरा पुलिया तिर फटफटी सवार दू मनखे ल टक्कर मार दीस। ए हादसा म दूनों इन के मउका म मउत होगिस। घटना के बाद घुस्साय लोगन म चक्काजाम करके विरोध जतइन। एखर पाछू अधिकारी मन मउका पहुंचिन अउ ग्रामीण मन ल समझाइन, तेखर बाद प्रदर्सन खतम करिन।

ऐति, राजधानी रइपुर के आरंग इलाका के पारागांव तिर घलो बिहनिया दू ठन टरक के बीच जोरदार टक्कर होइस। जेखर बाद दूनों गाड़ी म आगी लग गे। ए हादसा म एक इन चलइया के मउत होगे। मिले जानकारी ले एक ठन टरक के टायर फटे रिहीस, त चलइया मन गाड़ी ले उतरे रिहीन, तभे पाछू डहार ले अवइया दूसरइया टरक ह जोरदार टक्कर मार दीस।

ओति, राजनांदगांव जिला के पार्रीकला गांव के तिर काली रतिहा दू ठन गाड़ी टकराय ले छै लोगन घायल होगिन हैं। एमा ले तीन इन के हालत गंभीर बताय जावत हे। घायल मन ल इलाज बर अस्पताल म भर्ती कराय गेहे।

ठगी आरोपी—गिरफ्तार

रङ्गपुर पुलिस ह पांच करोड़ रुपिया ठगइया गिरोह के एक इन अउ सदस्य ल गिरफ्तार करे हे। जउन नौकरी देवाय के नांव म करोड़ों रुपिया ठगे रिहीन। पुलिस ह ए मामला म छै आरोपी मन ल पहिलिच गिरफ्तार कर चुके हे। मिले जानकारी ले बीते 29 जनवरी के दिन एक इन युवती ह सरकारी नौकरी लगाय के नांव म ठगी के रिपोर्ट दर्ज कराय रिहीस, ओखरे आधार म पुलिस ह कारवाही करे हैं। ए मामला म अब तक करीबन 25 ले जादा पीड़ित मन के चिन्हारी हो चुके हे। उन्हें, पुलिस ह आरोपी मन के बैंक खाता के करीबन 15 लाख रुपिया ल घलो रोकवाय हे।

श्रीमंत झा—सिल्वर पदक

नॉर्वे म आयोजित पैरा—आर्म रेसलिंग कप म छत्तीसगढ़ के पैरा—एथलीट श्रीमंत झा ह 85 किलो वर्ग म रजत पदक जितिस। 13 ले 15 फरवरी तक आयोजित ए प्रतियोगिता म श्रीमंत झा ह पोलैंड के मार्सिन कैप्लिकी ल हराके पदक जितिस। बतादन कि श्रीमंत झा भिलाई के रहवइया हैं। ओमन एखर ले पहिली घलो कतकोन राष्ट्रीय अउ अंतरराष्ट्रीय प्रतियोगिता म अपन प्रतिभा दिखाके स्वर्ण पदक जीत चुके हैं।

टीबी मुक्त भारत अभियान

केंद्र सरकार डहार ले सौ दिवसीय “टीबी मुक्त भारत अभियान” चलाय जावत हे। एखर तहत बिलासपुर रेलवे टेसन म घलो जागरूकता अभियान चलाय गिस। ए बेरा भारत

स्काउट—गाइड के लइका मन नुक्कड़ नाटक करके टीबी बीमारी के लक्षण, बचाव अउ इलाज के बारे म बतइन। कारीकरम म बिलासपुर रेलमंडल के वाणिज्य प्रबंधक अनुराग सिंह सामिल होइन।

मौसम

मौसम विभाग ले मिले जानकारी के मुताबिक एक घांव फेर हवा के दिसा बदले के सेति कमती अउ जादा तापमान म थोरकिन बाढ़त रइही। 18 फरवरी के बाद तापमान म गिरावट के कोनो संभावना नइ हे।
